

22 OCT 1998

Abdullah-APEC

APEC TETAP DIADAKAN DI MALAYSIA, KATA ABDULLAH

KUALA LUMPUR, 22 Okt (Bernama) -- Menteri Luar Datuk Seri Abdullah Ahmad Badawi berkata sidang kemuncak Kerjasama Ekonomi Asia Pasifik (APEC) akan tetap diadakan di Malaysia dan Presiden Amerika Syarikat Bill Clinton akan menghadirinya.

"Presiden Clinton telahpun menyatakan bahawa beliau akan menghadiri Persidangan APEC di Malaysia bulan depan," katanya pada sidang media selepas kunjungan hormat Perdana Menteri Ethiopia Meles Zenawi ke atas Perdana Menteri Datuk Seri Dr Mahathir Mohamad di sini hari ini.

Abdullah berkata demikian sebagai mengulas laporan media asing yang menyebut dua anggota kongres Amerika Syarikat meminta Clinton supaya mendesak agar tempat sidang kemuncak APEC diubah.

Menurutnya, anggota kongres Amerika Syarikat bebas menasihati presiden mereka.

"Itu hak mereka (anggota kongres), kalau mereka hendak menasihati presiden mereka sama ada hendak datang ke sini atau tidak," katanya.

Menurut laporan itu, White House dikatakan enggan menyatakan sama lawatan Clinton ke Malaysia pada 17-18 Nov sebagai lawatan rasmi atau lawatan negara.

Abdullah juga berkata tidak timbul sebarang kekeliruan mengenai status lawatan Clinton ke persidangan itu.

"Sebenarnya, kita memahami bahawa kehadiran ketua-ketua negara di Malaysia untuk APEC adalah sekadar menghadiri persidangan APEC dan bukan lawatan rasmi dan bukan lawatan negara," tambah beliau.

Terdahulu, Abdullah menandatangani bagi pihak Malaysia tiga perjanjian mengenai kerjasama teknikal, sains dan ekonomi serta perdagangan dan pelaburan dengan Menteri Perdagangan dan Industri Ethiopia Kasahun Ayele.

Menyentuh kenyataan dua anggota kongres yang turut meminta Presiden Clinton supaya memaklumkan kepada Dr Mahathir bahawa langkah ekonomi yang diambil adalah "sangat menyinggung," Abdullah berkata tindakan Malaysia adalah hanya untuk kebaikannya sendiri dan bukan bertujuan untuk menyusahkan mana-mana negara.

Abdullah berkata kenyataan anggota anggota kongres itu terhadap dasar kerajaan menunjukkan sikap yang sombong, angkuh dan suka menunjuk ajar orang lain.

" Mereka sendiri patut memahami bahawa mereka sendiri bersikap "offensive" katanya dengan merujuk kepada tindakan kongres meluluskan Akta Sekatan Iran-Libya yang menghalang syarikat asing mengadakan urusan niaga di kedua-dua negara itu.

-- BERNAMA

HAK FAZ